

L'ÓRBIGU

Buena parte de la historia de los ástures, romanos, suevos, visigodos... de la más recientes edaes media y moderna, podría contase dende les piedras de la ponte del Órbigu. Una ponte pola que pasaron siempre tolos caminos. Una comarca pa ver pasar dende ella la historia entero.

Les agües milenaries del Órbigu

El ríu Órbigu naz de les agües del Lluna y del Omaña, y desemboca nel Esla, a l'altura de Benavente. Cruza, al so pasu, munches comarques, pero namás una conserva na so toponimia'l nome del ríu: l'Órbigu, integrada polos conceyos de Turcia, Benavides d'Órbigu, Santa Marina del Rei, Villares d'Órbigu, Hospital d'Órbigu y Villarexu d'Órbigu.

L'Órbigu ye'l principal afluente del Esla. Cruza La Ribera, enantes d'entrar na comarca del Órbigu, propiamente dicha, p'abaxar per La Veiga y cruzar, tovía en tierres de Lleón, les comarques de La Valduerna, El Xamuz, La Valdeiría y El Páramu, p'adentrarse en Zamora pela comarca de La Polvorosa y les tierres de Benavente.

La ponte del Órbigu ye pasu obligáu del Camín de Santiago, qu'atraviesa tola comarca xuniendo Lleón y Astorga. Pero, estes tierres, dende antiguo, vieron pasar pueblos y exércitos enteros. Delles histories son mui conocíes, pero otres sonlo enforma menos.

Los suevos

A lo llargo de sieglu y mediu d'estancia de los suevos en Hispania, les agües del ríu Órbigu fueron escenariu de los principales enfrentamientos colos vecinos visigodos. El mapa de la época taba dixebráu pel ueste, nes tierres de la Gallaecia, pol reiunu suevu, pel norte, peles tribus ástures y vascones, que tanta guerra dieron a los sucesivos reis visigodos, como pa considerar buena parte de los historiadores qu'enxamás formaron parte d'una manera sustancial del reinu visigodu, y al sur, polos propios visigodos que tuvieron de forma principal la so capital en Toledo.

Los términos Reinu Suevu y reinu Visigodu tienen d'entendese dende'l sentíu d'una ocupación militar d'un territoriu más que d'una tresformación d'él. Los visigodos, el pueblu más conocíu y estudiáu de los dos, nun tuvo integráu nos momentos de mayor esplendor por más allá de trescientos mil persones. Los suevos, polos datos que se baraxen, ye probable que nun escedieran los cien mil.

Los suevos nun tuvieron más que sieglu y mediu na Gallaecia. Les sos lleis nun favorecieron la integración de los sos miembros colos habitantes del llugar. Asina, cuando en tiempos de Leovigildo, el reinu suevu desaparez failo en tol sentíu del términu. La so influencia malapenes se dexa sentir na toponimia y na llingua del llugar. Tal como llegaron, desaparecieron y el so rastru piérdese dafecho.

Con too, les tierres del Órbigu conserven memoria del primer gran enfrentamientu ente les tropes del rei suevu Requiario y les del rei visigodu Teodorico II. Yera l'añu 456. Los suevos entraran en Hispania nel añu 409 y asentáranse na Gallaecia nel 411. D'aquella, el rei suevu Hermerico, contituye'l so reinu, teóricamente federáu col Imperiu Romanu. La convivencia cola población hispanorromana fue bien difícil. La enemistá y les continues lluches colos visigodos, qu'entraran tamién en Hispania nel 411, fízolos acabar refuxaos nel finisterre del Imperiu.

En tiempos de Teodorico II, Requiario adoptó la fe católica. Yera'l primer rei bárbaru que lo facía. Un xestu dirixíu a cambiar les relaciones tirantes colos hispanorromanos, población mayoritaria del so territoriu. Aprovechando que Teodorico marchara d'Hispania y xuntara les sos tropes a les de Genserico pa cambiar d'emperador en Roma, Requiario llanza un despiadáu ataque contra la Bética, la Cartaxinense y la Tarraconense.

Teodorico II, una vez puestu emperador en Roma a Marco Mecilio Avito, preparó un impresionante exércitu na Narbonense y al frente d'él entró en Hispania dispuestu a finar d'una vez per toes col problema suevu. Xunto a les tropes visigodes formaba un enorme continxente de burgundios capitaneaos pol so rei Gundioco.

Los suevos, ante l'impresionante exércitu, nun tuvieron más remediú que replegase y prepararon la defensa del so territoriu a orielles del ríu Órbigu. Ellí midieron les sos fuerces el 5 d'ochobre del 456. El combate fue brutal. Al final del día les tropes sueves retiráranse en desbandada. Requiario fuxó como pudo del campu de batalla. Teodorico II ordenó la so persecución. Requiario pensó que Teodorico, después de la batalla, lu perdonaría. Hai que recordar que taba casáu con un hermana d'él. Pero nun sirvió de nada. Les tropes visigodes dieron con él después de dos meses de persecución y executáronlu ensin nengún miramientu.

Con too, el reinu suevo nun desapareció, pero'l sieglu de vida que-y quedaba viviólu arrexexáu nes tierras más allá del Sil. Acabó con ellos Leovigildo nel añu 585. Les tropes visigodes volvieron cruzar l'Órbigu. El tronu suevo ocupábalu un usurpador: Andeca. La defensa nun fue grande y los visigodos non solo ocuparon el reinu sinon que dexaron tropes permanentes nos principales llugares.

¿Cuála yera la razón pa que l'Órbigu tuviera n'aquelles dómines tala importancia estratéxica? Una fundamental, la ponte.

La ponte del Órbigu

Dende l'antigüedad, tolos caminos pasen pela ponte del Órbigu. A l'altura de lo que güei sigue llamándose Ponte d'Órbigu, frente a Hospital d'Órbigu. La impresionante ponte que güei continúa esistiendo, vien siendo dende dómina romana y, mui posiblemente, dende siglos enantes, el llugar de pasu davezu del ríu. A lo llargo de los siglos la importancia del enclave continuó demostrándose coles ampliaciones y tresformaciones que fue viendo esta ponte.

Güei sigue siendo pasu obligáu de los que transiten el Camín de Santiago. Pero, enantes, yá lu transitara la calzada romana que xunía Astúrica Augusta, Astorga, con Legio VII Gemina, Lleón. Como, de xuro, siglos enantes, serviría pa dar pasu a les tribus de los amacos y de los baedunienses que poblaben les sos orielles.

El Camín de Santiago nun coincide esacto col trayectu d'esa calzada romana. Asina podemos velo na toponimia cercana. Estébanez de la Calzada, a mui escasa distancia del Camín de Santiago, nun fai referencia a él, sinon qu'el so nome provién de l'antigua vía romana.

La edá media dexó la so alcordanza na ponte pol famosu fechu d'armes de don Sueru de Quiñones, un datu que recueye Cervantes na so primer parte d'El Quixote, y que-y dio nome al llugar del Pasu Honrosu. Fue aquella una fazaña de caballería mui de la dómina, que llevó a don Sueru a batise en xustes colos principales caballeros d'entós. N'alcordanza del fechu queda un placa conmemorativa na ponte y celébrese anguañu nel mes de xunu les Xustes Medievales, un espectáculo turísticu de gran repercusión nel entornu.

El topónimu Ponte d'Órbigu tuvo de nacer a partir de la propia ponte, pero tamién ye probable qu'a partir del asentamientu del nucleu de trabayadores que, en dalgún momentu de la so hestoria, emprendió la tarea de la so reconstrucción, sinon yá de la so factura orixinal. Frente a Ponte, Hospital d'Órbigu debe'l so nome a la existencia d'un antiguu hospital de pelerinos durante la edá media.

Recuerdos más recientes, pero non menos guerreros, falen del pasu de les tropes ingleses y franceses cuando la francesada, o guerra de la independecia, a primeros del sieglu XIX. Avanzáu'l sieglu volverían a cruzala, camín del so refuxu nes montañes, les tropes carlistes persigües peles cristines y volvería a ser, cásique un sieglu más tarde, llugar de frecuentes combates a poco d'estallar la guerra civil.

Otra ponte antigua ye la de Benavides d'Órbigu, de mínimes proporciones y que continúa sirviendo de pasu. Por más que, la tradición la vincule al pasáu romanu de la comarca, ye de factura medieval.

Adoba y tapiál

Nel conceyu de Turcia, el más al norte de la comarca, afayamos Pozuelu d'Órbigu, el primer topónimu que da nome a la comarca. Al estremu sur, nel conceyu de Villarexu d'Órbigu, alcontramos l'últimu, Villoria d'Órbigu. Ente ellos, en malapenes un espaciu de catorce

kilómetros, amás de los nomes de los conceyos que lleven el topónimu Órbigu, atópense los pueblos de Veguellina d'Órbigu, Villamor d'Órbigu, Moral d'Órbigu y Gualtares d'Órbigu.

Villoria d'Órbigu, “villa áurea” d'orixen romanu como tovía anguañu te recuerden los vecinos del llugar, conserva d'aquelles dómines la nomada “pontexa calicantu”, un únicu arcu d'una vieya ponte. Como entrada de la comarca pel sur, ye un villa perfecta p'alvertir les característiques principales de l'arquitectura tradicional de la zona. Unes característiques que definen una zona de transición, como yá vien ocurriendo en La Ribera, al norte, y que ye dexa ver a les clares en La Veiga, más al sur, y nes qu'apienza alvertise la importancia del barru como material de construcción, baxo les formes d'e tapial y d'adobe. Materiales que sufren, dende hai dalgo más de dos décadas, un francu retrocesu.

El tapial ye barru apisonáu Na seronda amontonábase la tierra que diba servir pa ello. Enriba d'ella cairien les agües serondiegues, les xelaes iverniegues, les grandes ñevaes d'entetiempes y el sol de la primavera. Con toos ellos, la tierra va morriendo y, tres d'un llargu procesu de removela, queda preparada pa servir de material de construcción.

Lo qu'ocurre –cuéntatelo tola xente mayor-, ye que yá naide trabaya bien la tapería como pa aprendela a la xente mozo. Perdióse'l vezu y, con él, perdiéronse los artesanos constructores que conocien les complexes técniques de la tapería. Modernos proyectos d'escuelas taller pretender recuperar esti ancestral oficiu que se pierde, poques veces meyor dicho, na nueche de los tiempos. Los resultaos d'un d'estos proyectos de recuperación puen vese nel pueblu palentín de Abarca de Campos. Oxalá que l'exemplu cunda y que la color de la tierra vuelva a prestixar les muries de los campos y los muros de les cortes, los payares, los palombares y les cases.

Más cenciellu de trabayar qu'el tapial ye l'adobe, otru material antiguu y propiu d'estes comarques. De la so antigüedad da cuenta –como señala'l llibru “Arquitectura popular en las comarcas de Castilla y León”, editáu pola Xunta de Castiella y Lleón- el relatu del llibru del Éxosu, na Biblia, que refier como'l faraón ñega a los xudíos la paya pa facer lladrillos: adobes. El diccionariu de Covarrubias señala qu'el términu vien del árabe “attub”, lladrillu. En delles partes del dominiu llingüísticu lleonés, l'adobe, términu masculín, pasa a femenín, la adoba.

La fabricación de l'adoba, anque cenciella, requier una técnica depurada. El barru tien de pasar pel cribru pa llimpiar les impureces. Depues, barru, paya y agua entemécense y vuélquense nunos moldes rectangulares, nomaos hormas o gradiellas, según la zona. Pa qu'el barru nun apegue a la gradiella muéyase con agua o úntase de cernada. Namás queda que sequen bien al sol. Pa ello, tien de tase al tantu de qu'el sol-yos dea per tolos costaos, de manera que reciban el calor de la forma más uniforme posible. Asina tienen fama las adobas de primavera, porque hubo tiempu de qu'el sol-yos diera a gustu y si se curió que-yos diera bien dao per tolos llaos, una buena riestra de lladrillos pasaba a formar parte de tapies y muries.

Les tierres de la comarca

La imaxen paisaxística actual más representativa de la comarca ye la de los sos campos de lúpulu. Esta planta utilízase pa la fabricación de la cerveza, xunto cola malta, apurriendo-y a esta bebida'l so amargor característicu.

El lúpulu medra xabaz en requexos lletos al abisiu, na riba de los ríos, esguilando pelos árboles del bosque de la oriella. Esti lúpulu xabaz ye de mui baxa calidá pal so empléu na industria cervecera. Por ello, dende primeros de sieglu vinieron faciéndose ensayos pa convertir el lúpulu nun cultivu rentable. Nos años caberos, ye Lleón, y de manera principal la comarca del Órbigu, onde se va a concentrar la mayor metada d'estos cultivos. La carrtera xeneral que xube agües del Órbigu arriba dexa ver la gran proliferación d'estos cultivos.

La comarca, en xunto, conserva delles histories sobre la repoblación de les sos tierres por mozárabes. Productu de la so estancia nestes tierres sedrien les importantes canalizaciones d'agua que dende antiguo convirtieron la comarca nuna de les más fértiles de Lleón. Delles, como'l Regueru Moro, del pueblu de Villoria d'Órbigu, fadríen dafecho referencia a aquella procedencia. La mayor parte d'estes preses de riego tan dataes nel sieglu XI, como les dos más importantes, la Cerraxera y la Castañón.

La bayura hortofrutícola de la comarca ye descomanada; ayos, cebollinos, remolacha, pimientos, puerros... Productos toos ellos que, xunto col interesante bosque de ribera que puebla les orielles del ríu, dan a la comarca un aspectu verde que llama n'especial l'atención cuando s'avera ún al Órbigu dende les tierres d'El Páramu.

El ríu, nesti sentíu, fai de frontera. Más que nada, hacia'l sur. Una diferencia que se marca enforma cuando pasamos a la comarca de La Veiga. Porque, al norte, les tierres de Santa Marina del Rei, les úniques de la marxen este del Órbigu, caltienen el doble sentíu de pertenecer a dambos paisaxes: San Martín del Camín ye tierra paramera a malapenes cinco kilómetros de la riba mesma del Órbigu.

San Martín del Camín, como'l so nome indica, ye'l primer pueblu del Camín de Santiago na comarca del Órbigu. A tres kilómetros escasos de Villadangos del Páramu bien podría dicise que se trata tamién del caberu pueblu d'El Páramu. San Martín conserva'l solar d'un antiguu Hospital, de pequeñes proporciones y a escasa distancia del más importante que daría nome a Hospital d'Órbigu. Esti pequeñu hospital fundóse nel sieglu XVII y mantúvose coles donaciones de los vecinos del pueblu y desapareció nel añu 1859, cuando los sos bienes fueron subastaos como consecuencia de la desamortización. El Camín atraviesa'l pueblu y baxa pela cai Ancha dirixendo los pasos del pelerín hacia Ponte d'Órbigu.

La iconografía del apóstol Santiago estiéndese per tola comarca. La más reputada talla del santu ye la de Turcia, datada a primeros del sieglu XVI, posiblemente d'un autor vinculáu a la catedral d'Uviéu. Tien de recordase, nesti sentíu, que la collación de Turcia perteneció al obispáu d'Uviéu hasta hai pocos años y d'ehí la posible influencia.

La ilesia más conocida de la comarca ye la de Santa Marina del Rei, d'estilu góticu-mudéjar popular. La so robusta torre y les sos inmensas campanes sirven d'imáxen representativa d'estes tierres. Como tamién lo ye'l retablu de la so capilla mayor, con una hermosa talla de madera policromada de la santa patrona, Santa Marina.

La güelga romana déxase sentir en tola comarca. A la "villa áurea" citada enantes, tien d'amestase los oríxenes de nomes como'l de Villarexu d'Órbigu, l'antigua "villa rexia", o'l de Villamor d'Órbigu, la "villa amoris" de los romanos. Una toponimia que se ve corroborada col presumible nome mozárabe de Benavides ("fíu d'Avides"), lo que daría carta d'identidá a la tradición de construcciones de les preses del Órbigu per parte de trabayadores mozárabes. Non solo esta güelga romana y mozárabe, sinon les citaes del Camín de Santiago y de l'alcordanza de les batalles a les sos orielles, son una bona disculpa pa percorrer esta comarca baxando les agües del ríu que-y da nome, l'Órbigu.